

Reaccion tocante problema di cacho di caya:

COMUNIDAD Y GOBIERNO MESTER TENE CUENTA CU OPINION DI TURISTA ALEMAN!

ORANJESTAD (AAN) -- DIARIO a haya reaccion riba e carta firma pa un turista Aleman. cu hunto cu 5 amigo mas a bin pasa varios dia di vacacion na Aruba entre final di december y cuminzamento di januari, y ken a haci remarca tocante e problema di cacho di caya, cu ta e unico aspecto negativo cu a hala su atencion den nos pais. Segun comentario duna na redaccion Salubridad Publico di Aruba mester sa mehor, pasobra enberdad e sushedad cu cachonan malo cu ta cana riba tur caminda na Aruba, ta un peligro potencial pa salud di nos comunidad, pero te ainda

instancianan concerni di gobierno, y tambe priva (di medio ambiente) ta haciendo NADA pa combati e problema serio di problema di caya cu tin na Aruba. Tin ciudadanonan cu tambe sa wak cachonan cu tumornan inmenso ta colga den su partinan intimo; cachonan cu ta expulsa sanger den nan sushi; cachonan cu ta saca riba caminda door cu nan ta come cuminda putri cu nan ta haya den bari di sushi; cachonan cu no tin cabey mas riba cuero ta cana yen di sarna y herida na bista publico.

Un persona a comenta cu casi

tur atardi laat e ta cana riba e caretera dilanti SVb, y ta mira den veranda di un di e clinicanan situa den e mesun area, un monton di cacho ta drumi. Logicamente ta cachonan di caya, pues e doñonan di e lugar posiblemente no sa mes, kico ta pasando ora e lugar ta cera.

Riba beach tambe tin un problema serio cu cacho. Banda di e cachonan di caya cu ta keiro riba beach, tin e cachonan domestico cu hendenan mes ta hiba lama, y cu tambe ta haci nan necesidadnan riba santo unda muchanan ta hunga.

E desaroyo aki no ta bon, pasobra "pu...di cacho sea cuida of nos ta keda un sushedad..." e persona a remarca.

Otro mahos bista ta ora automobilistanan ta dal cacho of pushi mata, y nan cadaver descomponen ta permanece riba caminda yena cu mosca y holo stinki, pa dianan largo.

TUMA EHEMPLO DI EUROPA:

A worde enfatiza cu na henter Europa tin un ley masha pisa, cu lo ta bon si por bin na vigor na Aruba. Esaki ta consisti di paga belasting riba cacho of cualquier otro animal domestico, y trata e animal manera un hende: mantene limpi, hibe veterinario, dune vitamina y bon cuminda, tene paden di cas, y identifica nan. Hasta tin un sistema cu tur famia cu tin cacho (y tambe pushi) nan nomber y adres ta aparece riba computer. E nomber, raza, y otro datonan di e cacho tey tambe, y obligatoriamente cada cacho mester tin su collar bisti cu su datonan "personal".

Cachonan no mag ta mara na cadena tampoco, pero den cura di cas mester tin un lugar cera pero amplio, unda e cacho por move na su antoho. Esaki encaso cu no ta posible pa tene liber den patio of tene paden di cas, specialmente si e animal ta bravo cu por haci hendenan daño, of pa evita pa e bay riba caya y worde

atropeya pa auto.

Ultimamente nan a introduci un sistema di alarma computariza pa cacho, di manera cu si un cacho ta sali perde, e cacho por worde identifica hasta pa polis, pa avisa e doñonan.

Multanen masha fuerte mes ta worde poni riba esnan cu ta maltrata nan animal, of cu ta lague abandona. Esaki ta nifica cu tur hende cu tin un animal den cas, mester para responsable pe, den tur sentido. Ora un animalito su salud ta asina malo, e doño ta obliga pa hibe veterinario pa e worde sacrifica. Na Europa, no ta cuestion di bay benta e bestia cu no ta util ni bunita mas, manera un pida paña sushi, unda cu ta.

Pesey segun e diferente comentarionan ricibi enberdad gobierno y nos comunidad, mester tene cuenta cu e opinion di e turista Aleman, cu ta masha na su lugar, y cu tal franqueza cu nos tur mester ta gradici, segun un di nos lectornan a acentua.

Na Hulanda ley a worde cambia

No mester spera 5 aña pa declara un persona morto


ORANJESTAD (AAN): Pa basta tempo caba parlamentario nan Hulandes lo a propone pa trece un cambio den un ley cual nan ta haya masha anticua. Ta trata di un ley na unda tin denuncia haci cu tal persona ta perdi of a desaparece y e famianan mester spera 5 aña pa declara e persona en cuestion morto. E aki lo bira awor un aña.

Motibo pa cual a trece un cambio ta debi cu 5 aña e famianan mester spera sea pa cobra seguro, casa, y otro rekesitonan cual esaki ta rese cune. Awor cu e intencion ta pa cambia esaki den un aña, e tramitenan lo por bay mas facil.

Mientras a keda cu mester tin fuerte indicacion cu e persona a desaparece y e por worde declara cu el a fayece. Na Aruba e ley keto bay a keda mesun cos esta 5 aña y no ta conoci cu aki tambe lo

propone un cambio tambe igual manera esaki lo bira na Hulanda.

NO MONEY NO LEGS!!



TELEFONNAN
DI DIARIO
826747
FAX
828551